

Drumi dushi!

“Señor Presidente, drumi dushi!” Ku e frase akí, Boudewijn de Groot a yega di terminá su kansion di protesta un tempu. Guera di Vietnam tabata den ful swin den e tempu ei na año 1965. Mas ku 50 año despues, De Groot su sarkasmo ta ketu bai na su lugá. Pero awor ta bai pa presidente komisarionan den nos propio pais.

Algun año pasá, nos a mira kon den presensia di huntanan di komisario, e tempu ei, di Refineria di Korsou N.V. i IUH N.V. sentenar di miones na plaka di gobièrnu (plaka di mi ku bo) a disparsé. Awor atrobe páginanan prinsipal ta yen di froudenan ku a deskubrí. Froude na boka di trabou i froude den tòp. Siman pasá, porfin a fiha fecha pa e kaso penal kontra èks direktor di Girobank. Froude tambe. I si, atrobe tur esaki ta kosta gobièrnu sèn. Pero kosnan ta mas pió ainda. Diripiente asin'akí a terminá e negosiashonnan tokante traspaso di e kontrato di Isla. Ta manera kos ku tin un konekshon. Nos integridat kolektivo ta na peliger. I realmente no ta trata akí solamente di N.V.nan di gobièrnu. Sektor privá tampoko no ta keda atras. Ultimo dos añanan akí, e kompania di aviashon di mas grandi di Karibe Hulandes ta seriamente malu i awor e ta na pal'i bida. Ta mas kla ku di dia ku ta trata akí di maneho inresponsabel i supervishon insuficiente. Mientrastantu a pòmp desena di miones na sèn di gobièrnu den dje pa asina laga e pashènt sigui hala rosea.

I pa e kompania di seguro di mas grandi den Karibe Hulandes tambe ta masha maniobra mester hasi pa manten'é operashonal. Grapsdónan den tòp ta un problema tur kaminda, esaki tambe ta mas kla ku di dia. Pero e ta afektá nos tur. E empresanan grandi akí ta krusial pa ekonomia di nos pais, meskos ku e refineria. Si nan ta kore e rísiko di sukumbí, e ora ei esaki lo tin konsekuensianan grandi inpremirabel i hopi negativo pa nos tur. E vibrashon negativo ta yega muchu mas leu ku te Wèspen so. Den e mundu grandi rondó di nos ei, ta persibí nos mas i mas komo un pais ku tiki integridat ku un industria komersial inkonfiabel. Esaki tambe ta kosta masha hopi sèn i oportunidatnan pèrdí. Ta drumi e komisarionan den e empresanan ei a sinta drumi? Ta kon a selektá e komisarionan ei? Via amigunan? Konosinan? Nan tabata profeshonal i independiente? For di kiko esaki ta sali na kla? A yega di evaluá nan funshonamentu ku sierto regularidat? Of por bisa ku aki tambe lásticamente e patronchi di kustumber ta visibel? Esta chèk komo komisario prinsipalmente detaye ku ta completamente insignifikante i mete ku esakinan di forma hopi intensivo, anto bisti klèp'i wowo pa asuntunan ku ta realmente relevante. A bira tempu pa komisarionan duna kuenta i rason públikamente tokante nan supervishon (defisiente?). Djis splika esaki numa den e relato anual. Den otro paisnan esaki ta mashá normal kaba. Esaki lo fòrsa komisarionan pa duna kuenta seriamente tokante nan responsabilidad, no solamente pa ku e empresa, pero tambe pa ku nos komunidad chikí i pues hopi vulnerabel. Hustamente e grado di moral di e empresa i su gerensia, pa ekselensia, ta responsabilidad di e hunta di komisario. Si esaki ta hasi falta, anto e ora ei pa definishon bo a faya bárbaramente komo komisario. Kuminsá

papia riba esei i legumai e diskushon tokante e kontrato ayá ku bo no ta komprondé niun pátaka di dje tòg, un ratu.

Presis mesun kos ta konta pa organisashonnan sindikal. Ta bon pa protestá kontra gerensia ora esaki kometé eror, pero analisá bo propio responsabilidat i integridat tambe un dje biahanan ei. Kon íntegro nos ta na boka di trabou? Kiko organisashonnan sindikal mes ta hasi na esaki? Nos no ta biba riba un isla, pero den un mundu-di-hende-grandi. I huntu ku esaki bo ta hañabo ku responsabilidatnan-di-hende-grandi. Si bo ta pensa ku e meilu grandi akí ta pas bo, hinka bo pia aden antó. No ta un meilu pa prepará pa kama si nò. Ke men nada kuent'i drumi dushi akí. Lanta ariba shonnan!



[Frank Kunneman](#)

VanEps Kunneman VanDoorne
Attorney at law | Partner

T +5999 461 3400 ext. 254

E kunneman@vandoorne.com
